

Friday, May 9, 2025

Time - 2:30pm

CM

Chief Minister Pu Lalduhoma’n vawiin khan India Army Major General Vijay Jotwani, Chief of Staff, 3 Corps, chu a pisa ah kawmin hmasawwna tur hrang hrang an sawi dun. Inkawmnah hian State chhunga Border Roads Organisation hmalakna te leh Sainik School chungchang te sawi lan a ni a, heng bakah hian Mizo Battalion Territorial Army bakah ex-servicemen te hamthatna tur chungchang an sawi dun bawk.



MHA

MHA Internal Security Division chuan social media-a Sipaita veivak leh chevel chungchang vawrh darh a khap. Nimin khan Ministry of Home Affairs (Internal Security Division) chuan state Chief Secretary leh DGP zawng zawngte hnenah lehkha hmanhmawh thlak kaltlangin Media mite hriattirna a thawn a. He hriattirnaah hian tunlaiin India leh Pakistan inkarah boruak muanawm loh a thlen mek avangin Sawrkar Laipui chuan venghimitu sipaiho te veivak leh che vel reng reng thlalak, video leh news anga vawrh darh a khap a ti a, Ram venhimna atana hriattirna pawimawh MHA in a tichhuah hi Mitin te - a bikin Media leh Social Media lamah content creator te leh vlogger te chu zawm vek tura hriattir an ni a ti bawk.



INTERNATIONAL NURSES WEEK

International Nurses Week pualin vawiin khan RIPANS chuan Millenium Centre chhuat zawlah mipuite tan a thlawna inentirna hun an buatsaih.

College of Nursing, Regional Institute of Paramedical & Nursing Sciences, Zemabawk hian vawiin khan mipuite tan hriselna kawnga inzirtirna leh a thlawna inentirna hun an buatsaih a, A mamawh tan multivitamins leh pum damdawi a thlawna pek niin damdawi hi Hauz Pharma Pvt Ltd ten an rawn thawh a ni.

Kum tinin International Nurses day hi May ni 12 ah hman thin ani a. Modern Nursing hmu chhuak tu Florence Nightingale piancham pual in 1974 atang khan hman tan niin International Nurses week kar khat chhung hian khawvel pum ah Nurse ten thil tha tih nan hun an hmang thin a. Mizoram ah chuan damdawiin leh nursing zirna in hrang hrang ten Nurses day thupui zirna bakah hriselna kawnga zirtirna pek te leh mipui hriselna endik nan hun an hmang thin a ni.

Ripans-a zirtirtu Pi Laldinpuii Sailo chuan vawiina free clinic an buatsaih ah nursing faculty leh nurse zirlai mi 35 in an thutchilh thu a sawi a, a duh apiang tan a thlawna inentir theih bakah damdawi pawh a thlawin an sem tih sawiin mipuiin hna an thawh theih nan hriselna a pawimawh hle ati a, hnathawktu hriselna atan nurse te chuan mawhphurhna sang tak an nei tih a sawi bawk.

Nurse te hi damdawiin piah lam ah Health centre hrang hrang ah an thawk in, hriselna kawnga sawrkar hmalakna hrang hrang hriselna endik te, nu naupai, naupang, kum upate hriselna enkawl kawngah hna thawk thinin Damlo ten an hmuh hmasak ber leh an hmuh hnuhnun ber chu Nurse te an ni a, dinhmun harsa taka an awm laia puitu leh hnem tu an ni.

